

德壯果公年譜

德壯果公年譜卷八

次孫花沙納恭纂

嘉慶二年丁巳

十一月十四日

公偕明亮惠齡奏言臣明亮德楞泰自在華龍山徽子坪等處擊殺竄匪以後敗逃之賊日夜狂奔臣等飭將官兵騾駒鍋帳概行留後親率鎮將帶領奮勇兵丁裹帶餉糧由銀硃壩一路漏夜進發十月二十八日趕至周家壩追及賊蹤察看該處岡嶺重疊蹊徑交錯因與興肇賽沖阿率領鎮將兵丁酌分四路以兩路繞道抄出賊前兜擊以

兩路自後追勦該匪分據山梁捨命抗拒官兵爭先競進
殲賊四五百人生擒六十三名該匪力不能支俱由瓦房
店一路狂奔臣明亮德楞泰卽乘勝追至瓦房店於空屋
內搜獲冒充難民之劉宗梅等十七名當飭隨營道府研
訊據供賊人連被官兵勦急聞前股賊匪由五郎壩一帶
西竄急欲趕上合夥今日至瓦房店將人數畧爲齊集卽
分兩股由長嶺蜡溪壩等處奔竄等語當卽分別正法一
面派撥弁兵搜捕一面率兵進追初一日追至上高川探
知惠齡等已帶兵馳抵西鄉其前竄一股業經攔頭截殺
餘匪向西北敗竄因思此股賊匪被勦前竄正可與惠齡

兩面夾擊臣等由撈魚壩連夜追勦當卽飛咨惠齡由黃草坡迎擊初三日未刻臣明亮德楞泰由板廟子將賊匪追殺至白河峽正值臣惠齡同提臣富成帶兵已自三郎

鋪一路迎勦前進賊匪後被追擊前被截殺捨命衝撲其時臣明亮率同阿哈保等由後緊勦絕其退路臣德楞泰率同賽沖阿等繞出山後擊其中堅臣惠齡富成率領六

十七等迎頭勦殺攔截去路該匪前後衝突官兵槍擊箭射四面圍勦賊匪首尾不能相顧官兵自未至酉愈勦愈力計斃賊一千餘名生擒周仕登等二百餘名其時天色已晚餘匪乘山霧四合之際穿匿深林臣等三路官兵分

投勦捕復搜獲王瑤等七十一名婦女幼孩四十六名口
其穿林逃遁餘匪約有數百名向西南大山一帶分投亂
竄臣等訊據活犯供稱此股首逆齊王氏張漢潮等因見
官兵連日擊斃頭人甚多已先後逃入前股賊內俱向漢
中一路奔逃臣等因恐首逆正犯或乘間竄逸不可不細
加根究將該犯等隔別嚴鞫僉供大頭目等均已會合前
竄等語查此時東路安康紫陽石泉一帶均已廓清各首
逆俱歸入前股賊內由西鄉向漢中一路竄走該處現有
恆瑞慶成帶兵堵勦兵力不充臣明亮德楞泰卽日由西
鄉司渡河一路進發臣惠齡富成卽日由西鄉沿江一路

進發其逃往南山等處餘匪已飛飭太平防守之道員李
鎗遊擊劉大魁都司陳弼等將現帶分防兵勇一千七百
餘名分布要隘加意截擊并飭分防茶鎮一帶之署總兵
田有成帶同參將槐他哈移兵前赴南山及川省連界一
帶逐一搜捕以冀一律俘擒

諭曰摺內所稱首逆齊王氏張漢潮等大頭目均己會合前竄是
首逆數人已有實在下落覽奏畧慰明亮德楞泰著各賞玉喜
字牌大小荷包惠齡恆瑞興肇富成慶成著各賞玉煙壺大小
荷包賽沖阿阿哈保達音泰觀祥著各賞玉搬指大小荷包以
示鼓勵至漢江上游冬令水涸而甯羌沔縣等處並無江水阻

隔恐賊匪被勦緊急向該處奔竄亦不可不豫爲防範明亮等
已知會柯藩速將下游防守官兵撤赴上游節節防堵而甯羌
河縣等處又有英善在扼要地方相機策應想賊匪等無從他
遂明亮等不可不倍加奮勉迅速會合兜截擒渠以副委任

二十日

諭曰此時首逆歸併一股向西鄉漢中一帶奔竄明亮德楞泰與
惠齡會合後卽分路進發自己趕上賊匪正可與恆瑞慶成兩
面夾攻何以未據馳奏朕亦不忍加之催促但勁兵健馬俱在
明亮等軍營而黑龍江官兵月半前亦已早到且朕所屬望者
惟此一路聲勢浩大足以兜圍賊匪爲一鼓殲擒之舉勉之望

之

二十二日

公偕明亮惠齡恆瑞慶成奏言查首逆姚之富李全齊王氏高均德等合夥西奔逼入漢中南岸山內自黃官嶺至新集連營二十餘里漢中以西至沔縣甯羌一帶爲漢江發源之所江面不寬現屆冬令水勢日涸可以淌渡之處甚多該匪逐日在沿江窺伺總思乘間北渡而北岸長寨新街子黃沙鋪舊州鋪各隘口近接郡城北達褒城均關緊要臣恆瑞慶成先帶兵在黃沙鋪扼要堵截臣明亮德楞泰惠齡因追捕首逆將鍋帳驃駄留後星夜遄行初八

日亦抵漢中察探情形公同商酌必須將官兵由南北岸兩路前進庶夾攻截勦均爲得力是以臣惠齡同臣富成

當卽帶兵渡過北岸於長寨地方堵截與臣恆瑞慶成等

互爲聲援

臣明亮德楞泰帶兵於南岸油防街一帶相機

進發正在會商勦辦賊人益加情急思竄初十日乘天色

未明大夥由元子山衝出江岸一股向新街子一路撲渡

一股向長寨一路撲渡

臣等彼此接據探報遂各路整兵

進擊

臣恆瑞慶成率領官兵在新街子沿江一帶路口設

伏賊人騎馬者先行偷渡步賊隨後官兵誘賊將至半渡

臣恆瑞慶成率同觀祥等帶領馬兵衝至江岸奮勇壓擊

斃賊無數侍衛保邦首先迎住賊隊射殺戴紅頂花翎賊
目一名驍騎校承書干總祝成龍把總溫起龍俱奮勇涉
水爭先手刃數賊生擒十數人奪獲馬數十四後隊步賊
復蜂擁而至有執刀矛直前抗拒者有背負行李互相牽
掖四處奔渡者臣恆瑞慶成飭步兵排列岸口截殺施放
連環轟擊賊人退而復上者數次俱被官兵擊退共又殲
戮賊匪七八百名生擒龔玉等六十一名其搶渡長寨一
股賊匪以該處江狹水淺一擁直前臣惠齡先已飭令衆
兵斫削尖利竹籤於江岸水底層密排插該匪大馬猛進
俱爲竹籤所傷戮斃百餘名生擒數十名後隊之賊仍分

股兩旁奔渡臣惠齡同富成穆維等率領兵勇競進勦殺復斃賊二百餘名生擒劉復等二十九名其時臣明亮率

同阿哈保達音泰長春巴圖魯侍衛富僧德等帶兵由南

岸高臺寺葛家灘沿江一路兜擊臣德楞泰率同興肇賽

沖阿巴圖魯侍衛達爾精阿等由南岸沿江上水渡一路

進勦賊人狡詐異常分股向新街子長寨等處搶渡尙留

數股在新集黃官嶺屯聚欲俟臣等官兵追勦渡過北岸

該匪再由山內衝出撲官兵後隊以爲乘間竄渡之計臣

明亮德楞泰途中探知賊情並知惠齡恆瑞慶成等兩路

擊勦江北可保無虞竊計賊人志在偷渡前竄不防後擊

正可因其詭計制勝

臣明亮德楞泰當卽繞道翻山仍分

兩路抄出賊後出其不意自上壓勦官兵將至黃官嶺山

下賊人膽敢率衆迎敵官兵分投併力截勦殺賊三四百

名賊人退向西南翻山逃竄

臣明亮德楞泰帶領馬兵趕

擊追至李家集地方適

臣惠齡恆瑞慶成兩路將搶渡賊

衆擊敗俱由北岸追勦前來三面合擊復斃賊四五百名

餘匪亡命肆逸官兵分投追殺二十餘里沿途殺斃甚多

時已將暮因各路沿江營卡緊要恐賊詭譎將

臣等三路

官兵俱牽引南岸趁北岸防兵不足之時別覓山僻小徑

乘間偷渡所關匪細是以將各路官兵撤回原營計是日

各路所殺賊匪二千餘名生擒一百三十五名奪獲馬駒器械衣物無數臣等細心會籌各首逆等皆籍隸襄樊南

鄧等處是以總思北竄漢江逃回本地萬一賊人竄過北

岸仍由商雒一帶奔逃致甫經安集之地復被蹂躪更覺

不成事體而當此官兵緊逼之時賊人拚命擗鋒毫無忌

憚沿江一路隘口仍須加意防備况察賊奔竄路徑西北

可達甯沔地界查甯沔以上江流益窄偷渡益易現在

惠齡恆瑞慶成仍由北岸繞道抄截臣明亮德楞泰自南

岸緊躡兜截如賊人直向西南山內前竄則臣明亮德楞

泰總視首逆所在緊跟勦捕若南竄川省廣元通江等處

正可與英善等兩面夾擊

臣

惠齡一路亦接續迎前惟當

察看賊蹤相機會勦至漢中郡城地關緊要現有漢興道

文需署副將瑪靈阿督率分防兵勇稽查周安漢郡以下

江面柯藩已將前設紫陽一帶防兵捲撤前進逐節安卡

並親在郡城左近往來梭巡紫陽以東下游岸口有秦承

恩王文雄督兵防範數百里江岸布置已極爲嚴密可籽

聖塵

十二月初二日

公偕明亮惠齡恆瑞慶成奏言賊匪自在漢中新街子長
寨黃官嶺等處被官兵分股截殺向西南山內逃遁

臣等

當卽分路兜勦該匪竄至新集地方復分前後兩隊奔逃
前隊係高均德一股經臣恆瑞慶成在桑樹灣擊退後折
回燕兒溝胡家壩一路東竄後隊係首逆齊王氏李全姚
之富王廷詔張漢潮等數股經臣明亮德楞泰跟蹤兜擊
十四日探知該匪尚在唐家壩屯紮遂酌派步兵分布各
山親率興肇賽沖河河哈保達音泰長春木騰額侍衛阿
納保富僧德等帶領馬兵直前撲勦斃賊二三百名該匪
肆行衝突復經步兵圍擊奮勇攬殺其時臣惠齡正由銅
錢壩馳赴青羊驛堵勦途中聞槍砲聲卽率兵向南迎勦
沿途殲獲竄匪數十名帶領馬隊趕至唐家壩併力勦殺

該匪益形情急卽竄上山頂將漫山枯草木植分燃思拒官兵以便卽從山後竄走官兵衝冒烟焰一擁而上追殺十餘里復斃賊百餘名臣惠齡因恐該匪竄及江岸仍帶

兵抄回青羊驛兜截

臣明亮德楞泰乘勝由涼埡子鐵鎖

關一路緊追十八日至離甯羌州治二十里之羅村壩地

方賊匪正在焚掠勢將進逼州城

臣明亮卽同興肇賽沖

阿侍衛達爾精阿等搶上右手露風埡山梁

臣德楞泰同

阿哈保侍衛墨爾歡保等搶上左手楊巖頂山梁該匪反

身迎敵臣明亮德楞泰飭步兵排列於前將大礮槍手排

設於後暗令各兵誘賊匪結隊撲近然後前列步兵閃開

槍礮並發該匪竟愍不畏死蜂擁來撲離前列步兵一箭
之地我兵分閃兩旁立將槍礮施放匪衆猝不及避擊斃
無數後隊賊人正欲退走臣明亮德楞泰復率同遊擊蒲

臣

尙佐蕭福祿守備馬應國帶領滿漢屯土撒拉爾回兵壓
下賽沖阿率同協領明保等帶領吉林馬隊往來擊射殲
戮尤多又附近羅村壩之楊家山有避難男婦一千餘名
楊嚴洞有避難男婦二千餘名賊人分股在彼掠取糧食
擄脅民人當派副將劉廷基遊擊達自祥都司應元寬等
分往衝擊派知府嚴士鑑州同徐如灝等分往收卹賊人
見官兵馳至慌忙潰散全活男婦三千餘人適臣惠齡由

北面抄截前來

臣

恆瑞慶成因追擊桑樹灣敗竄之賊取

道甯羌亦卽帶兵趕到併力夾攻官兵歡呼奮勇該匪奪

路亂竄

臣

明亮德楞泰由甯羌城東北古城一路追擊跟

勦三十餘里前至二郎壩

臣

惠齡恆瑞慶成由甯羌西南

高寨子一路追擊跟勦二十餘里復殺獲二三百人一面

令遊擊馬瑜至州城安撫計此次打仗殺賊一千五六百

名生擒頭目石貴等五名餘匪李元德等二百餘名齊王

氏甥女許女子一口持械女賊魯何氏等十三口其餘婦

女張吳氏等一百二十三口幼孩七十九名口均經分別

辦理該匪由二郎壩西流河折向東北仍合一處飛遁官

兵追至三更暫行駐紮查二郎壩東北卽爲楊家河向北
可至新集又離漢中不遠審訊獲犯據供各首犯總要渡
過漢江往河南去前在漢中被官兵打敗各頭人商量要
進攻甯羌州擄掠衣食就往廣元將棧道擋住使川陝兩
省大路隔斷官兵信息不通彼時或往四川或由寶雞等
處北去今又被官兵截住各頭人仍由原路折回要趕上
高均德一股同回漢中趁官兵都在西面正好由漢中過
江等語臣等若合兵追擊反恐逼令前竄江岸是以臣明
亮德楞泰仍由鐵鎖關一路向東兜截臣惠齡趕赴沔縣
北岸向南迎勦飛咨烏爾圖那遜圖桑阿等帶領索倫勁

旅自漢中相機前進或在南岸迎擊或由北岸截殺併知
會柯藩察探賊蹤沿江密堵臣恆瑞慶成現奉
諭旨速赴川省協同宜縣剿賊卽於二十一日由甯羌入川從廣

元前進

初六日

公偕明亮惠齡奏言臣等前將甯羌賊匪擊敗後該匪復
由新集黃官嶺等處折竄漢中仍圖渡江北遁正值烏爾
圖那遜圖桑阿等帶領索倫官兵於二十二二十二兩日
全馳抵漢中南岸二十四日該匪等乘早霧迷漫之際由
黃官嶺向長寨一路偷渡經防江兵丁探知分投稟報臣

明亮德楞泰已馳至南岸高臺寺臣惠齡已馳至北岸黃沙驛當卽督兵進擊烏爾圖那遜圖桑阿副都統銜溫春亦帶索倫勁旅自東迎勦柯藩帶領防江兵丁在北岸轟打四路官兵併集其時賊人已奔到江岸淺處搶渡烏爾圖那遜帶兵馳馬衝入江心抄殺臣惠齡亦自北岸渡過南岸迎擊臣明亮德楞泰將官兵分爲兩隊自西而東橫衝截殺將賊匪分爲兩截自辰至午截住賊匪一千餘人盡行殲斃後隊賊衆卽向東南山內亡命肆竄臣等卽分投追擊該匪狡詐已極穿林越嶺俱向極窄之路竄逃欲使馬隊官兵不能追擊臣等當派驍健步兵及屯土撒拉

爾回兵進追吉林索倫官兵亦多棄馬奔上隨勦隨進追殺三十餘里沿途殺賊無數餘匪隨山徑曲折前竄均被官兵從青石關梅子壩一帶逼入川省通江境內該處係曾經蹂躪之區焚掠既空茲復闖入勢益窮蹙正當趁此機會四面布置漸次逼剿查此時西面廣元昭化一帶已有恆瑞慶成帶兵四千餘名前往又有英善帶兵於保甯堵截南面渠縣達州一帶亦有宜縣一路官兵東南則有舒亮穆克登阿一路官兵惟東面大甯夔巫一帶僅有觀成德齡兩路官兵臣惠齡現帶兵三千五百名由西鄉太平前赴大甯夔巫一帶密探賊蹤兜勦臣明亮德楞泰率

領原兵併同烏爾圖那遜等帶領勁旅三千名由青石關
跟蹤擊勦至北面川陝交界處所現在賊人旣入川境離
江岸已遠防江各兵無須照前安設業經咨照柯藩率同
愛星阿田有成各領原帶官兵共五千餘名於川北與陝
省交界處所相機堵截總兵王文雄所帶兵二千名已咨
會奏承恩於興安左近相度地勢防堵併飭該鎮暫行駐
守以備調用

諭曰此次賊匪因官兵截勦緊急搶渡漢江經烏爾圖那遜等帶
領黑龍江官兵馳馬衝入江心抄殺而明亮德楞泰惠齡等率
領鎮將官兵分投迎擊殲斃賊匪一千餘人追殺三十餘里賊

人無路可逃均被官兵逼入川省通江境內現在分路兜勦所
辦俱好明亮德楞泰惠齡烏爾圖那遜興肇賽沖阿阿哈保溫
春富成圖桑阿著各賞給玉喜字搬指併大小荷包等件圖桑
阿並著賞還侯爵仍著明亮等將騎馬衝入江心殺賊之黑龍
江官兵共有若干名查明覆奏加恩獎賞

二十七日

公偕明亮奏言賊首齊王氏姚之富等前在陝省經官兵
處處截殺卽乘勝追剿入蜀該匪等復思牽制官兵分股
奔竄齊王氏姚之富李全等由青石關回軍壩一帶前遁
勢將擾及通江縣治高均德等由青石關西河口一帶狂

奔欲仍由小道折回陝省甯羌地界

臣等酌量情形兩路

均關緊要是以

臣

德楞泰帶兵由通江回軍壩一路兜勦

臣明亮帶兵由南江西河口一路抄截齊王氏等竄至通

江貴仁關適遇

臣

德楞泰一路官兵抄前截殺該匪不能

進撲縣治卽翻山向西沙壩等處旁竄其高均德一股自

西河口由北面山徑奔逃

臣

明亮察探路徑逐日緊躡抄

擊該匪畏避南奔

臣

等彼此知會兩路夾攻追逼初二日

追勦至麻柳灣地方殲殺無算將兩股分竄之賊仍逼歸

一路詎該匪不能分股折竄並因川匪冉文儔一股自焚

擾南江之後竄及廣元百丈關齊王氏等遂合夥由流溪

羅家壩等處奔竄冀與會合臣等一面漏夜追擊一面派

賽沖阿阿哈保阿穆勒塔達音泰長春遊擊馬瑜等繞道

向前與臣等兜截夾攻初三四等日視賊人所向隨勦隨

進該匪未能趕上冉文儔合夥窮蹙之餘復生詭計欲將

官兵誘向東南以便北竄入陝遂自橋壩五郎廟四方坡

一帶直趨西北廣元大道臣等鼓勵兵勇不帶鍋帳冒雪

履冰黑夜進至分水嶺四方坡二處扼要攔截該匪膽敢

捨命直前衝撲被兩處官兵截殺賊衆踉蹌遁走復由四

方坡北面折回在大蘭會白果樹等處屯紮臣等乘勢亦

折回追擊臣德楞泰率同賽沖阿阿哈保等抄向五郎廟

穩木壩一帶絕其折回之路

臣

明亮率同興肇烏爾圖那

遜圖桑阿溫春等在溪口一路兜勦

臣

德楞泰率兵趕到

五郎廟已值深夜遂分派官兵在東面一帶山林溝內埋

伏至初七日丑刻賊人分遣探馬或二三十人或七八十

人赴各山探望路徑是夜正值大雪官兵在設伏處所借

雪光瞭望明白不出聲息誘賊近前突出擊殺所有偵探

賊人三百餘名一律殲擒

初八日早

臣明亮德楞泰各帶

官兵前後進擊賊人恃人數衆多竟向五郎廟山頭衝突

臣德楞泰同賽沖阿等分據山包槍擊箭射賊人撲上三

次被官兵併力壓勦殲賊多人賊始敗退又值

臣

明亮等

由後兜擊前來首尾截殺該匪困而猶鬪分投抗拒官兵
呐喊爭先殲斃甚多生擒執旗頭人四名餘賊始紛潰
逃官兵乘勝追殺共計擊斃七百餘名生擒劉永興等二
百十八名餘賊俱向北面獨山一路狂奔該處山徑幽仄
馬兵不能進追恐墮賊人奸計當將官兵在對面山梁紮
住遂提集獲犯嚴訊據供首逆齊王氏等幾股會合後總
要渡過漢江前往河南因在陝西被官兵處處攔截前月
二十四五等日又被殺敗齊王氏姚之富等要想將官兵
誘入四川我們仍由通江南江邊界分起回陝前日因官
兵緊跟姚之富說不如竄往百丈關會上冉文儔一股可

以抵敵官兵一面攻打廣元一面由棧道回陝及到四方
坡又遇官兵打敗齊王氏又說且折回五郎廟一帶如過
得去卽仍由原路回陝若再遇官兵卽入獨山一帶山內
小路甚多大半與陝西交界官兵總不能路路擋住就仍
折回陝西等語當將該犯等正法稟示查獨山以北係達
野人村竹壩子等處可通陝省甯羌官兵若徒步追勦恐
反逼令折回陝境因查東北有黃柏埡可以扼要堵截臣

等當卽率兵前進抄截並接惠齡來咨已由西鄉馳赴太
平臣等卽飛咨惠齡在太平一帶暫劄毋庸前赴夔巫如
該匪果折回陝境卽帶兵仍至西鄉自東堵截並囑柯藩

愛星阿在北面川陝交界一帶嚴堵不使再入陝省窺伺
漢江

諭曰賊匪逼入川省之後復分股奔竄首逆等由青石關一帶冀
欲滋擾通江又有一股欲由小道折回陝省其詭詐情形實爲
可惡可恨但明亮等果能設法前兜後圍將首逆速行擒獲則
餘匪自必解散乃惟知跟蹤追勦以致賊匪東奔西竄分股逃
逸似此遷延日久本不應加之恩賚姑念時屆歲除仍頒年賞
以期共迓春禧明亮德楞泰興肇烏爾圖那遜圖桑阿賽沖阿
阿哈保阿穆勒塔溫春達音泰長春木騰額著各賞給大小荷
包俾伊等同沾喜慶迅勉成功現在各股首逆俱會在一處明

亮等務須上緊籌辦趁此賊匪窮竄之時易於集事

二十八日

公偕明亮奏言首逆齊王氏等在五郎廟勦敗後向獨山一路奔逃臣等查明路徑獨山之北係野人村竹壩子等

處該處東北黃柏埡地方爲通陝省要隘兩山壁立路通一線可以扼要迎擊當飭將弁酌帶兵勇將鍋帳等物由

獨山一路前進使賊人祇防官兵在後追擊

臣

等挑帶滿

漢勁兵於初八日夜卽由五郎廟抄向黃柏埡兜勦初九日未刻趕至該處派漢兵數百名於埡口南面扮作鄉勇堵守臣等率同賽沖阿哈保巴圖魯侍衛等分帶各兵

於埢口北面山梁駐伏使賊人自南而北不見官兵可以誘賊近前痛加擊殺十二日巳刻賊人果由野人村一帶前來見埢口北面所設卡座無多信爲鄉勇卽搖旗呐喊蜂擁撲上各兵畧放數槍抵禦卽故作退卻之勢避至埢口北面臣等率設伏各兵從左右兩路突出擊斬賊人驚駭錯亂卽欲退遁臣明亮率同興肇阿哈保等由左山梁德楞泰率同賽沖阿達音泰等由右山梁各壓下抄殺自己至未共斃賊七八百名生擒二百餘名賊匪翻山溜坡紛紛旁竄臣等分投追殺至二十餘里之寬灘河敗逃各匪分爲兩股一由橫擔梁向香爐山竄走探係齊王氏

等一向船頭嶺竄走探係高均德等查該二處俱北通陝
境甯羌一帶山高澗闊道徑險仄賊人詭計欲將官兵誘
入深山使馬匹不能追逐糧食難以接濟臣德楞泰率同
賽沖阿等不帶鍋帳挑帶壯健馬步勁兵裹帶乾糧由香
爐山緊躡進剿不與以暇又恐該匪等或經官兵追剿緊
急折竄西北勢將復擾廣元由棧道大路入陝臣明亮卽
同興肇烏爾圖那遜阿哈保圖桑阿巴圖魯侍衛等亦酌
帶官兵兼程進發由廣元向北抄擊兩面夾攻並飛咨愛
星阿柯藩等帶兵在川陝交界一帶迎截咨會惠齡在太
平暫駐相機策應所有連日生擒之犯內有廖邦會何萬

仁何化隆楊升全何文舉等五名訊係頭目卽行凌遲梟示其餘二百十二名係久經從逆戰手卽行正法餘犯六十三名係脅擄入營卽行保釋

諭曰明亮等一路兵多將廣賊勢日蹙本日奏到之摺仍係分路抄截卽所殺賊匪不過七八百名仍未擒獲一二賊首猶不滿意至香爐山船頭嶺等處賊匪旣能由此竄逸豈有官兵轉不能行走之理明亮等惟當趁此賊匪窮蹙分竄之時圍逼兜勦使賊匪驅歸一路將首逆按名擒獲儻令賊匪北竄偷渡漢江闖入棧道則伊等獲罪更重慎之慎之

三年戊午

公五十四歲

正月初五日

公偕明亮奏言首逆齊王氏等自寬灘河勦敗後分股逃竄臣等查各首逆中惟齊王氏最爲狡詐夥黨較多自宜先籌勦蕩臣德楞泰率兵緊躡齊王氏捨命狂奔從大紫壩溫家坪等處折竄俱係幽僻山道當卽鼓勵將弁星夜急追於八廟河抄前襲殺十七八等日連接四仗殺賊千餘名生擒李發祥等一百五十七名黑龍江藍翎甲兵富明阿尤爲驍勇出力因與賊攬殺左手二指被刀傷斷猶能手刃二賊外委陳啟林頭帶石傷臣明亮因恐齊王氏

等被迫緊急竄及西北棧道大路遂率兵由廣元一路抄
截行至九曲坡探知齊王氏等分遣夥黨於廣元境內滋
擾牽制官兵十七日李全一股竄至旺倉壩焚掠臣明亮

率兵迎頭截殺殲獲三百餘名該匪踉蹌奔逸官兵追勦
前進至元壩子地方又遇張漢潮阮學明一股從該處竄
出將撲廣元縣治闖入棧道臣明亮同興肇圖桑阿等分
帶官兵抄擊自己至未殺賊一千數百名生擒王先等二
百十七名搜獲南江縣儒學印信一顆餘匪乘山徑曲折
分向西南山內逃遁縣治得以保護查元壩子地方離廣
元棧道不遠且聞齊王氏一股大隊復由曾家河一路西

竄逼近棧道

臣

明亮遂儻由廣元抄入棧道闌截二十二

日馳抵神宣驛正值齊王氏等竄入茅壩一帶欲由轉斗

鋪衝入棧道當飭將弁扼住神宣驛要道親帶鎮將兵丁

馳至轉斗鋪迎擊其時

臣

德楞泰已率同賽沖阿溫春等

由曾家河前至黃壩驛兩面並進首尾夾攻該匪分投抵

禦弁超上四面山梁呐喊衝突

臣

等分飭官兵四下擊射

斃賊六七百名生擒張能舉等一百餘名該匪力不能支

俱逃入山內官兵乘銳追擊復斃賊二三百人仍將官兵

在青樹灣暫紮棧道得以疏通查賊匪現竄之處山南係

廣元所屬山北卽甯羌地界訊據活賊等供稱齊王氏等

因到處經官兵攔截不能與川省同教會合商量分股將官兵引入西南仍乘間折回北面陝省地界希冀搶渡漢江等語臣等商定仍自西北從甯羌一帶沿途偵探若該匪竟狂奔陝境卽從沔縣馳赴漢中一帶迎擊務當乘賊窮蹙之時令其無路可逃自當不攻而潰

諭曰齊王氏分投逃竄德楞泰率兵追勦明亮由廣元抄截並迎擊李全張漢潮等廣元縣治得以保護齊王氏等欲衝棧道復經兩面夾攻痛加殲殺所辦尙好藍翎甲兵富明阿外委陳啟林均爲出力著以應陞之缺陞用

初八日

公偕明亮奏言

臣

等前在轉斗鋪將齊王氏姚之富等股

匪夾攻截殺該匪敗向山內逃竄恐徒事尾追不能得力

二十四日卽取道甯羌由西北前進兜勦該匪折竄廣元

甯羌交界二郎壩一帶

臣

等正在繞道進攻二十七日接

據漢興道文霈稟報高均德一股賊匪由南江折回南鄭

縣屬之紅廟塘二十四日竄至周家坪從兩卡之中繞小

道北竄過江其時柯藩在甯羌堵禦惟愛星阿在郡城防

江聞信卽先遣副將官信參將達柔阿帶兵二百名馳赴

江北萬壽寺堵截復親帶兵三百名繼進截勦斃賊二百

餘名生擒六名賊匪由猴子嶺沙園子繞赴郡城愛星阿

馳回郡城督率兵勇竭力擊禦賊匪敗向東北洋縣一帶
逃遁以目下賊情而論齊王氏爲各逆之魁自宜先籌勦
蕩以地勢而論高均德旣已渡江如東竄興安則與西安
省會甚近且界連豫楚秦承恩景安及王文雄等所帶防
堵之兵無多恐難逐處嚴布卽愛星阿聞信緊追前往柯
藩亦自甯羌挑撤兵勇跟勦已由城固前至洋縣兵力均
單且所帶皆係步兵追勦未能捷速是以臣等卽連夜帶
兵由沔縣褒城馳抵漢中將防堵江岸事宜布置妥協卽
日前進趕緊截擊但齊王氏等匪現於川陝交界滋擾亦
須防其北竄漢江縣五千餘里水又淺涸處處皆可偷渡

因酌留烏爾圖那遜帶領山西兵五百名於甯羌要道防
堵又酌留荊州協領喜卜產帶領荊州滿兵三百名於沔
縣防堵至漢中爲郡城重地已酌留興肇帶領荊州滿兵
五百名督同文需帶該處兵勇防禦柯藩爲本省提督呼
應較靈且於江岸情形熟悉應仍同愛星阿各帶原兵四
千於川陝交界及江岸一帶分布嚴堵不特防守江岸正
可截斷賊勢如該匪竟東竄西鄉一帶卽飛咨惠齡帶兵
由太平趕赴西鄉防勦如齊王氏等竄川省計川省除向
有各兵外現經勒保帶到勝兵三千名又額爾登保勦賊
完竣亦卽帶兵赴川又有恆瑞慶成帶兵四千餘名協勦

足資分布臣等原帶官兵除添安各處防守並前經添撥
惠齡恆瑞慶成兩路外現帶勁旅及滿漢各兵八千名臣
等仍合兵一路星夜前進跟蹤抄截速翼擒渠

按是時上以明亮及公舍大股賊匪於不問輒帶前隊勁兵追勦高均德僅留弁兵數百名在後防堵茫無主見調度失宜命拔去花翎嗣復革退世職紫纓並追前所賞銀五千兩入官

十八日

公偕明亮奏言高均德股匪竄及城固洋縣一帶臣等在甯羌聞信當卽星夜帶兵趕至洋縣囑柯藩帶領原兵並愛星阿所帶之兵仍回漢中一帶防堵江岸臣等卽率兵探蹤加緊前進初三亥刻馳抵洋縣龍泉鋪時值大雪

知賊人尙在金水鋪暫紮卽乘雪夜猝進攻擊

臣

德楞泰

同賽沖阿等帶領馬隊勁兵先行

臣

明亮同圖桑阿等帶

步隊繼進初五日五鼓行至金水鋪左右山梁時賊人因

雪阻未前

臣

等驟從兩面山梁壓下槍擊箭射賊人勢不

能支卽成隊攀越北面山梁官兵併力趕上勦擊殲賊三

四百名餘賊翻山而走官兵追至大河壩賊人分向山林

莊屋內藏匿意欲誘官兵四下搜捕該匪得以分投肆竄

臣等當令賽沖阿阿穆勒塔帶領官兵繞出賊前設伏遊

擊蒲尙佐都司達自祥應元寬守備李東山等各帶官兵

及墨爾根勁兵向村中莊屋搜擊擒賊百餘名逾時賊衆

果從林內衝出伏兵齊起擊射並用大礮轟打殺賊四五百名賊人衝河北遁官兵亦踏水追殺初六日辰刻追至三河口正飭官兵炊食賊人竟敢反身迎敵分數路蜂擁而來兇悍已極臣察明路徑亦卽分路追殺賊人抵死撲

鬪憑高飛擲槍石

臣明亮同圖桑阿副將劉廷基抄上右

路梅子坡山梁絕其來路賊人連撲兩次被官兵迎頭截殺槍箭具舉鎗賊二百數十名賊始敗退臣德楞泰同達

音泰副將扎爾杭阿搶上左路二郎碥山梁進擊將左一

路賊匪截爲兩段痛加攬殺其中路四方山及溝內衝出兩股匪衆又經阿哈保溫春副將德甯遊擊蒲尙佐等擊

敗賊人披靡潰亂踉蹌逃遁行李馬匹棄滿山溝臣德楞
泰同賽沖阿達音泰等隨勦隨進三十餘里自辰至酉各
路官兵共計殺賊六七百名生擒劉元義余一貴等二百
餘名其被擄民人有拋棄器械投出者有分投逃避藏匿
山林覓路回歸者共計一千四百三十名口現飭隨營道
員陳蘭森溫承惠等審訊核辦是日該匪敗遁後向交溪
河金子山一路四竄東達五郎關北通秦嶺均與西安興
安切近若徒事追勦反恐驅令前奔臣德楞泰由袁家莊
一路兜勦防其北竄沿途搜擒散出之賊六七十名臣明
亮由青草關一路迎擊防其東遁沿途搜獲九十三名口

均經飭委道員逐加研訊其被脅良民卽令安爲安撫連
日打仗遊擊蒲尙佐布特哈委署參領杜爾圖把總賀廷
印委驍騎校趕品班達爾什均有受傷其受傷陣亡兵丁
各部辦理再頭起調到之撒拉爾回兵一千八百名自上
年六月間隨臣等軍營勦賊頗爲奮勉出力緣在川省水
土不服病亡至四百餘名嗣卽帶赴湖北陝西仍復勇往
打仗自賊匪折入川境該回兵以時屆春耕就陝省回歸
較近呈請暫行回籍臣等查此項回兵籍隸邊徼本與各
營官兵有別素以種地爲業今隨征一載家口無資未免
心懷顧慮現在勁兵齊集足敷勦匪自應仰體

聖慈矜卹外番至意卽令回籍以順吏情現飭副將李文蔚帶領沿途約束仍傳集頭人賞給銀紬按名獎勞該回兵均各歡欣感誦

天恩業已遣令回籍訖

二十七日

公偕明亮奏言

臣

等前因賊匪向交溪河一帶敗竄細察

賊情不能北竄秦嶺卽慮東擾五郎該匪在城固洋縣界逼擄多人夥黨較衆是以分帶官兵由袁家莊青草關兩

路前進沿途搜獲匿匪共二百餘名

臣

德楞泰行至獅子

壠探知竄往東岳甸賊匪欲向龐家溝前遁卽飛卒滿漢

官兵進剿斃賊三百餘名生擒張廷魁王興貴等一百二
十一名復派兵三路追擊其時賽沖阿率領吉林協領明
保等帶領馬兵鎮臣長春率遊擊伯明等帶領雲南廣西

兵搶上左手王家山乘勝壓勦直衝賊隊生擒劉有才等
二百三十四名殲斃滾崖者無數達音泰率遊擊達自祥
等帶領漢屯川兵副都統阿穆勒塔率總管色爾滾等帶
領索倫馬兵由右手大壠溝抄截橫衝斃賊甚多生擒王
老五等一百九十二名臣德楞泰率同巴圖魯侍衛等帶
領墨爾根兵丁漢屯奮勇官兵由中路周家坪馳勦前衝
後擊攬殺多時進追三十餘里殺賊千餘名是日計三路

官兵共殺賊二千有餘生擒賊匪五百四十七名內有賊
目劉明貴一名割獲首級七百六十三顆並有被擄民人
謝成富等男女二百九十餘名口從賊隊內逃出拋棄器
械跪求投誠訊係城固洋縣一帶民人當卽收撫官兵進
至安子溝因時已三更暫行紮住詎賊匪復連夜折回衝
撲官兵營卡據哨兵稟報卽密飭各兵准備誘賊近前槍
箭並發賊人擁衆往來衝突連撲三次勢甚兇悍經賽沖
阿達音泰阿穆勒塔各帶官兵陡從卡內跳出身先士卒
併力壓下殲賊千餘賊始敗退號叫狂奔臨陣投出者又
有南鄭褒城等縣被擄民人張文學等男婦一千二百三

十餘名口交與該地方官妥爲撫卹官兵仍乘勝窮追於
南田溝截殺賊人二百餘名於魚洞子截殺賊人三四百
名於九貫溝紅巖溝四畝地等處截殺賊人七八百名生
擒頭目朱其貴趙文科二名訊係賊營副元帥均無要供
卽於軍前梟示槍斃僞先鋒楊從廖其昌二名其餘臨陣
擒獲及山溝林內搜捕者連日共得千餘名沿途投出者
每日或數十名數名不等該匪本欲由金雞河北竄江口
經官兵緊躡截剿遂由旁路翻山敗向甘家碥一帶東竄
五郎進擾廳治該處爲邪匪聚集之所雖經投誠改悔猶
恐乘機蠢動適臣明亮一路官兵先已由五郎進發該匪

竄及甘家礮之時正值臣明亮派阿哈保帶領索倫馬兵遊擊張朋帶領綠營兵勇前往拏卡阿哈保等當卽率兵迎頭截擊臣明亮亦同圖桑阿等繼進殲賊四百餘名生擒張奉林等一百二十七名該匪遁入深林由小道竄向五里六里七里各溝臣明亮星夜追擊於喬家溝貓兒嶺砂坪三道梁竹山溝等處連接五仗殲賊二千餘名生擒大頭目陳有賢何啟昌等並餘賊二百十五名官兵復進追至廟丫子該處左右兩山皆係深林密箐該匪乘月夜隱匿兩山林內欲待官兵追過該處折回抄截當經阿哈保張朋於途中拏獲探信之賊訊出賊情臣明亮遂因其

詭計派阿哈保副將劉廷基侍衛達爾精阿等帶兵由左手山後抄出臣明亮等直前撲勦阿哈保等暗從山後搶上山頭出其不意陡用連環轟擊兩山賊匪登時驚亂阿哈保等率兵穿出深林壓下痛勦殲賊七八百名生擒黃世榮等二百七十四名頭目徐大元胡大益二名官兵一鼓作氣追至樓房溝沿途投出者四百六十七名餘匪亡命前奔官兵追至西川東川適臣德楞泰在十八丈龍王廟一帶聞信偕賽沖阿達音泰長春率領馬步各兵趕到會合併剿斃賊一千三四百名生擒男婦七百四十七名各山搜出男婦二百八十三名查賊匪北竄漢江後本有

萬餘人又於寢城南鄭城固洋縣沿途逼擄者不下四五千人自經官兵趕上日夜抄擊旬日以來勦除業已過半在逃之賊勢甚窮蹙恐情急假裝難民偷竄臣等已飛札

奏承恩嚴飭各營卡留心查拏

臣德楞泰仍率領輕騎勁

旅星夜跟蹤緊勦

臣明亮接續前進不與以暇務將首逆

高均德等刻日就擒至連日打仗頭等侍衛阿那保委署

參領富新西爾遜西靈阿哈勒章扣驥騎校巴彥保守備

何君佐馬元把總彭家棟均經受傷此外傷亡各兵俟查

明另行咨部再前奉

諭旨令將騎馬衝入江心殺賊之黑龍江官兵共有若干名查明

覆奏查其時派列前隊擊賊者係黑龍江官兵一千名該弁兵因賊匪撲近江岸卽衝入江心擊殺實爲出色奮勇且邇來日夜追勦竄匪因馬力迅速仍用該弁兵爲前列每遇接仗無不爭先競進其中有屢衝賊隊殲賊多名者有馳擊逸匪不遺餘力者有當賊亡命衝撲奮力抵勦者均屬分外驍健謹開單恭呈

睿覽

諭曰明亮等所奏仍不過在五郎一帶分路勦賊雖摺內稱殺賊六七千名俱係高均德等在漢中一路逼脅裏掠之人卽生擒投出者大半皆係該處難民婦女幼孩并未能擒一首逆殊不

愷意向聞賊匪詭計將邪教同夥之人悉行帶往向前奔竄將
裏脅難民等留於後路牽綴官兵官兵趕到僅將此等在後之
人殲戮虛報功級而大夥匪徒轉得愈竄愈遠每次殺賊大率
如此今明亮等此奏仍係復蹈前轍且據稱德楞泰督率勁旅
跟蹤進剿明亮接續前進等語尤不成話賊匪既向東奔竄明
亮俟德楞泰自應設法抄向賊前截擊乃德楞泰已落賊後而明
亮俟德楞泰帶兵去後始行接續前進豈不更落賊後明亮德
楞泰著傳旨嚴行申飭

二月初三日

諭曰前次明亮德楞泰追剿高均德股匪將吉林黑龍江勁旅全

數帶赴陝省竟置姚之富齊王氏等大股賊匪於不顧節經降旨嚴飭並以後股賊匪若接踵而來陝省無大兵堵截則姚之富齊王氏等必思趕上高均德一股合夥今秦承恩所奏果不出朕所料若明亮德楞泰前此分一人酌帶勁兵在南岸堵勦則齊王氏王廷詔等豈能闖入陝境是伊二人調度乖謬之罪更無可辭伊等若能速將高均德等擒獲殲盡餘匪合兵向南迎勦後股賊匪尙可勉自湔贖儻高均德尙在奔逸所餘賊匪無多明亮德楞泰二人內卽分一人酌帶勁兵回向西鄉一帶迎勦如伊二人實有不能分身之處卽於巴圖魯侍衛及總兵內派令二三人帶兵卽赴西鄉等處幫同柯藩等夾擊亦可得

力著明亮等酌量而行不可稍存觀望致有貽誤

初十日

諭曰秦承恩奏高均德股匪經官兵分路兜截折竄鎮安此股匪匪前竄入陝境時爲數本屬無多卽或有脅從之人節經明亮等勦殺據奏殺賊六七千名所餘詒屬無幾乃明亮自前次奏到後距今已逾旬餘未據續有奏報或現在緊躡賊蹤無暇具摺此時賊匪已折竄鎮安秦承恩與王文雄馳赴山陽一帶探蹤迎擊明亮等務須趕緊追勦會同夾擊儻與賊以暇再稽時日或賊匪復有南竄與齊王氏等合夥之事則舒亮穆克登阿卽前車之鑒況此時高均德股匪在漢江之北而齊王氏等屯

聚西鄉一帶在漢江之南相距尙遠賊勢未能遽合明亮等尤須奮力追勦擒獲高均德再赴西鄉協勦後股竄匪以期立功自贖

十三日

公偕明亮奏言賊匪前經官兵分投兜勦捨命奔逃臣等帶領官兵於十九二十兩日在太白廟風巖溝雲蓋寺等處或繞出其前攔頭痛勦或設伏路口突擊橫衝斃賊一千餘名生擒男婦五百六十一名口各兵丁亦各勇往用命陟險攀山不遺餘力該匪肆竄狂奔臣等又分路前進臣明亮追至三官廟探知左右四山竄匪甚多當同圖桑

阿等帶兵搜捕該匪等初猶冒充難民散處樹林巖洞之內及官兵臨近竟敢施放號槍四山奔聚併力抗拒官兵分路搶上山包奮力勦殺斃賊四百餘名追殺逃出者百餘名又於各山搜殺一百十三名生擒一百三十七名驍騎校趕森保前鋒瑚福因首先衝入賊隊猝被矛傷陣亡官兵盡一日之力將三官廟一帶藏匿留後牽制之賊盡行殲擒臣德楞泰追至沙河溝口賊匪正在溝內我兵分兩路從上壓下斃賊一百餘名又於界牌石場殺賊不計其數生擒頭人魏順鄭冠羣二名賊匪裴從科等四十二名賊從廟峽子竄逃時已深夜官兵又乘夜追至曹家河

馬家溝殺賊三百餘名追至文家埢生擒何美等三十一
名隨馳至東毛坪紅巖一帶督勦生擒七十三名訊供高
均德已竄入湖北鄖西境內廟川地方意欲逃奔河南等
語臣德楞泰當卽趕赴廟川痛加截殺並經該處鄉勇堵
截該匪仍折回陝省歐家川地方臣德楞泰飛派官兵進
剿賊匪占據山包施放槍礮並用擂石擲打抗拒官兵分
三路截殺左一路係賽沖阿達音泰帶領滿漢官兵由東
家坪廟川追剿右一路係阿哈保長春帶領滿漢官兵由
石板溝董家川截勦臣德楞泰率同阿穆勒塔巴圖魯侍
衛遊擊馬瑜等帶領兵勇由太平橋進攻各官兵一鼓擁

上攬殺多時箭射頭人王文貴一名擊斃騎馬賊匪甚多殲斃步賊七百餘名割獻首級九十五顆搶獲虜山礮五位生擒李文宗陳國有等男女五百七十二名口官兵內防禦西凌阿副將劉廷基遊擊劉惟馨均各受傷該匪被勦情急奔上三十六巖是日風雨交作山石冰凌官兵愈攻愈力賊匪皆滾坡逃逸其時臣明亮由康家坪一路兜勦前進探知賊匪欲由羅家河康家坪向北竄遁當遣溫春愛星阿帶領索倫官兵馳至羅家河迎擊溫春等率兵趕往正值賊匪在該處村莊擄掠經官兵自上下擊該匪奔上山梁抵禦溫春愛星阿亦卽率兵搶上擊射繼以短

兵相接斃賊二百餘名賊衆翻山四逸官兵乘勝追擊生擒周正才等五十八名協領克什保因追殺騎馬賊隊猝被矛傷陣亡賊匪敗逃後俱向青銅關一路南竄查青銅關路徑分歧東面可達山陽西面可達鎮安西北可折回五郎臣德楞泰拏獲鍾文貴等據供賊匪要由米糧川秋梁川逃往山陽前入豫境又查米糧川爲赴山陽要口一經堵勦賊匪自難由此路竄走當卽率兵由曹家川抄出米糧川一路兜截該匪望風畏避又從洵河一帶南竄山陽等處得保無虞臣明亮已由柴家坪躡勦前進仍彼此知會於長坪地方會合緊追勦擊總期併力逼歸南面迅

速擒掃惟昨接秦承恩來札並道員溫承惠稟報齊王氏
一股於正月二十四日由川省南江竄入西鄉簡池壩一
帶臣等商酌此時勦辦高均德一股正在喫緊得手之際
必須旁抄後擊而齊王氏一股亦急須截勦因飛咨柯藩
酌帶官兵馳赴西鄉在漢江北岸相機迎擊飭署鎮田有
成在附近西鄉東面一帶堵勦並飭道員溫承惠在興安
郡城率領兵勇防守旋據漢中府知府趙洵稟報探得後
股賊匪於正月二十八日由石泉縣黑石頭地方躡水渡
江臣等愈形焦急伏查齊王氏姚之富李全王廷詔高均
德張漢潮等各逆上年本分四股滋擾繼又合爲三股由

川楚竄入陝境

臣

等疊加痛勦其時有惠齡富成恆瑞慶

成柯藩王文雄等各路官兵合計二萬餘名兵力本充分

股堵勦得以逼歸一處入川詎該匪等復分起折回陝境

偷渡江北高均德一股原有萬餘人

臣

等連次勦殺現在

夥黨不過二三千人今後股賊人復又自南而北齊王氏

李全王廷詔等是否俱在其內尙未可定高均德勢必竄

往會合未免人數驟增

臣

等一路官兵除分撥惠齡富成

恆瑞慶成帶赴川省外現僅存滿漢官兵八千餘名如該

匪全數渡江仍分股肆竄

臣

等以次遞勦恐另股之賊乘

間蔓延若分投勦辦又恐不敷分布惟有儘此兵力合力

併勦斷不敢稍有遷延但恐賊匪被勦回竄東北此時豫省有景安帶領兵勇在邊界防堵惟楚省襄樊一帶兵守未免空虛又無大員彈壓現在惠齡恆瑞慶成兩路官兵已在川省勦賊難以抽撤前來竊計額爾登保勦辦朱里寨餘匪想卽日可以擒渠藏蹟若令就近帶領勝兵馳赴襄樊一帶迎勦較爲周密

諭曰明亮等所奏情形仍不過在三官廟等處地方勦賊所殲賊匪亦祇脅從夥黨並未擒一賊首且摺內稱三官廟一帶藏匿留後之賊悉行殲除可見伊等仍前墮賊牽綴官兵奸計僅將襄督留後老弱之賊勦殺充數而首逆等轉得乘間折回鎮安

其勢必與後股賊首齊王氏等合夥豈伊等毫無儆懼耶明亮
德楞泰著再傳旨嚴行申飭

十五日

諭曰西鄉罐子山股匪在城固地方竄過漢江賊首李全張添文
又分出一股西竄南鄭之西壩等處而齊王氏高均德兩股又
俱竄至漢陰地方此皆由明亮德楞泰辦理遲緩勦捕不力所
致厥罪雖均然德楞泰打仗數次尙能向前殺賊明亮則屢次
落後惟事尾追伊等原摺具在非朕任意軒輊明亮種種疎縱
玩誤之罪較德楞泰爲尤重現在李全等在後尙未竄合明亮
德楞泰惟當知愧知懼速將齊王氏高均德等合夥賊匪趕緊

■右光緒乙亥詩卷之三
七三
辦竣再將李全一股截勦猶可稍贖重罪

又

諭曰現在川省賊匪正需勒保在彼督率勦辦一時未能到陝宜
縣則早經諭令速回興漢一帶駐劄計此時自應到陝今明亮
既不可恃宜縣竟當速赴明亮等一路軍營將所帶官兵悉行
統領督率德楞泰等實力勦辦振奮士氣

二十三日

公偕明亮奏言臣等前將高均德一股賊匪連次殲殺該
匪折向南竄正在乘勝逼勦詎後股賊匪復渡江而北前
至鐵爐壩與高均德會合沿途捕獲賊匪王國相等訊據

供稱續來之賊係齊王氏一股齊王氏因高均德一股屢被官兵擊敗人數無多分給一二千人幫同抵抗官兵等語數日以來該匪等時分時合擾至安康界內兩河關趙

家灣一帶

臣

等查該處係四達之區東北可通鎮安山陽

商州東南可通洵陽及湖北鄖西等處官兵必須分路兜

截

臣

明亮當卽率同圖桑阿賽沖阿溫春長春等帶領官

兵由譚家壩松樹埡一路抄至蘭草坪

臣

德楞泰率同阿

哈保阿穆勒塔達音泰木騰額愛星阿等帶領官兵由大

橋老樹嘴一路抄至張家坪該匪聞兩路官兵前來退至

判官嶺該處山深林密溝澗幽深既可據險埋伏抄截官

兵並易從小道奔竄

臣等彼此知會星夜前進十一日

臣

明亮等率兵抄出判官嶺之西北截擊

臣德楞泰等率兵

抄出東北夾勦令圖桑阿達音泰木騰額長春愛星阿各

帶官兵由判官嶺南面左右山梁兩路並進該匪等於溝

內排列四五百人誘官兵進溝勦殺山林內復擁出伏賊

數千人併力抗拒賽沖阿溫春阿穆勒塔達音泰愛星阿

等首先從兩山壓下賊衆見兵勢勇猛仍穿入深林

臣等

飛飭四面用槍礮轟擊約半時之久賊衆站立不住成隊

衝出捨命力鬪官兵斃賊甚多有穿紅衣賊目在後指揮

率黨死拒賊人有退卻欲逃者該匪呵叱使前官兵奮力

殲殺擒獲騎馬賊目馮大申朱錫二名並射死穿紅衣賊目二名殲斃三百餘名賊人仍逃入深林紛紛狂竄

臣

等

分投追勦殲擒二百餘名該匪等俱由兩旁高山林內肆逸官兵自未至申攢殺三時共殲戮五六百名生擒七十

二名當將馮大申等嚴訊據供齊王氏與高均德商量原

說不從商州到河南就從洵陽到鄖西昨日聽得松樹埡

麻坪河兩路都有官兵高均德說若仍由北路前去恐官

兵緊跟還要喫虧須當分爲數股從小路轉回南走牽誘

官兵進入深山可以合力抵敵否則由小道繞出鎮安洵

陽北去官兵就不能趕上等語察其供詞係屬狡謫實情

當將該犯等凌遲正法臣等查賊志總要前竄東北被官兵分路抄擊復又南奔恐賊人詭計往往東擊西竄惟有乘勝擊勦隨時相機兜截總不使賊匪肆竄東北亦不墮賊奸計爲其牽制臣等現由東北向南逼勦昨准興肇來札漢江南岸已無賊匪興肇已帶領荊州滿兵會同柯藩前進協勦臣等飛咨令其各帶官兵探明賊蹤與臣等兩面夾擊

案是時上適褫明亮職命解京治罪逮此奏入旋以追勦賊匪正在喫緊軍營乏人命暫留軍營作爲領隊帶兵而公偕宜縣趕緊勦辦

三月初三日

公偕明亮額爾登保奏言

臣

明亮德楞泰前將高均德齊

王氏兩股賊衆逼勦至判官嶺地方痛加截擊該匪折向

西南蘭草坪一帶竄擾當率將弁抄至該處帶領馬步兵

丁兩面衝擊將賊人中一隊二百餘人截住殲殺無遺其

前後各隊復向西南漫山四竄阿穆勒塔等帶兵分投追

殺斃賊百餘生擒二十八名內陳德饒王國用二犯係齊

王氏營領兵頭目據供賊意總要向東北奔竄逃回河南

湖北因屢被官兵截殺暫時折回西南俟將官兵誘入西

南山內再從小道繞出鎮安山陽一帶前去當將該犯凌

遲正法查兩河關地方爲數州縣交界之所係東北面要

路當卽率兵馳赴扼要截勦並派副將扎爾杭阿帶兵躡勦派守備馬應國酌帶兵勇扮作敎匪尾隨前進

臣額爾

登保亦於是日趕到旋據馬應國稟報賊匪由廟溝等處

繞道竄及鎮安西北境內勢將由野竹坪舊縣關直趨東

北

臣額爾

登保率領

臣長春

協領德明泰等共帶滿漢

兵四千餘名於是夜二鼓由柴溝口屹塔寺一帶進勦

臣

明亮德楞泰帶兵六千名由石板溝雲蓋寺一帶兜勦二

十二日午刻

臣額爾

登保行至野竹坪賊匪正竄至該處

焚掠當卽奮力轟擊賊匪捨死擣鋒分三路抗拒隨率同

綸布春等亦分三路奮勦斃賊三四百名生擒八十餘名

賊匪始向西南山梁敗退其時

臣明亮德楞泰正由小廟

嶺前進行至野竹坪西面聞槍礮聲卽親率馬兵翻山壓

下兩面夾勦賊匪惶急狂奔又經官兵擊斃一二百名餘

賊皆翻山越澗疾竄

臣

等率兵乘勝追殺至舊縣關沿途

殲戮甚多察看賊人敗竄道路一爲黑虎廟一爲紙房溝

均可達商州山陽兩處地界並訊據獲賊劉與得等僉供

齊王氏高均德等現俱逃往黑虎廟一帶還要向東北去

等語查山陽商州與商雒鄖陽接壤

臣明亮德楞泰卽日

由舊縣關左首採玉窑一帶抄赴商州迎頭擊勦此次打

仗官兵間有受傷陣亡另行查明咨部

諭曰齊王氏高均德等欲將官兵誘入西南山內卽從小道繞出
鎮安山陽一帶竄入楚豫狡計可惡明亮等遲逾多日此次所
奏仍不過追勦竄匪殺賊亦屬有限所辦何事明亮德楞泰著
傳旨嚴行申飭現在宜縣馳抵陝境當速赴鎮安一帶督兵進
剿此時額爾登保已抵該處宜縣務須大加振作督同趕緊勦
辦祇須將首逆拏獲匪黨無難殲淨

初六日

公偕明亮額爾登保奏言

臣

額爾登保星夜馳赴商州一

路臣明亮德楞泰星夜馳赴山陽一路各扼要隘以便截

擊詎賊入狡詐異常分向西南狂遁齊王氏直趨商州高

均德直趨山陽行走甚速

臣明亮德楞泰於二十六日兜

至山陽峒峪河正值賊匪竄近該處當卽率兵進剿將前

隊迎頭截殺殲擒百餘名賊人敗退後竄擾下關坊隘口

離山陽縣城二十餘里該縣居民聞風驚避當飭隨營道

府安撫彈壓一面親率巴圖魯侍衛鎮將官兵等抄馳迎

截該匪分占左右山梁施放火槍拋擲石塊

臣明亮同賽

沖阿等搶上右手山包

臣德楞泰同溫春等搶上左手山

包不避矢石一擁競上將兩山賊衆壓下併力攬殺賽沖

阿同阿穆勒塔首先衝入奮勇擊射殲殺尤多佐領噶塔

保章果保當被矛傷陣亡官兵儘力追勦超越四五重山

包共殲賊四百餘名生擒田賜福等六十二名內曹先配

熊朋鳴羅崇發鄭自順四犯係戕害噶塔保等之賊當予

斂割斬梟士卒稱快餘賊向商州一路狂奔官兵乘勝兜

勦臣額爾登保於二十六日馳抵商州據報齊王氏一股

將至九間房離州甚近卽親率官兵同綸布春等進擊至

九間房正遇賊匪結隊前來當飭各兵分伏山後民村迨

賊臨近施放號槍一鼓並進賊人情急亡命力拒綸布春

德明泰格布舍等帶領馬隊搶入撲勦慶溥長春等率步

隊兵丁在外圍勦左馳右擊殲賊六百餘名生擒曹如松

等九十三名當卽駢戮佐領胡世訥猝被弒傷陣亡餘賊

向西北敗逃我兵追殺二十餘里沿途復斃賊八十餘名
適據商州知州馳報高均德一股經明亮等截勦不能奔
出山陽竄及該州東境臣額爾登保復由寬坪一路抄出

上關坊迎遇高均德一股正在率兵攔擊維時臣明亮德

楞泰已由下關坊疾馳兜勦前來遂率兵兩面夾攻殲賊
三百餘名生擒劉性賢等五十八名賊匪從旁翻山向西
南狂遁時已深夜暫行紮駐臣額爾登保察看齊王氏一

股自九間房西竄勢必侵入藍田卽由吳家莊抄越兜截
高均德一股自上關坊東奔勢必折回黑山及九里坪等
處希圖繞赴鄖西臣明亮德楞泰亦卽率兵馳赴黑山並

派賽沖阿達音泰帶兵趕赴九里坪截殺次日高均德一
股果先竄及九里坪經賽沖阿等抄前截殺賊復奔至小
河口一帶復經臣明亮德楞泰率兵截擊該匪折回犀牛
槽逃遁該處北通藍田該匪自必直前奔竄仍與齊王氏
會合惟當緊躡賊蹤將兩股逼歸一處以便夾攻得力連
日打仗傷亡兵丁另行查明咨部

諭曰齊王氏一股自九間房敗竄意欲侵入藍田而高均德一股
折回犀牛槽亦欲北竄藍田是兩股賊匪又將合併額爾登保
現已先往藍田明亮德楞泰緊躡高均德一股賊蹤若能兩面
夾擊將首逆一併拏獲固屬甚善否則視何股賊首緊要即併

力先將一股賊首擒獲後再行勦辦一股庶兵力得以整隊兜
勦而賊勢漸孤易於搜捕明亮等務須各加愧勵以期稍贖前
罪其殺賊陣亡之佐領噶塔保章果保胡世訥俱著各部加等
議卹

初八日

諭曰此時額爾登保自早抵藍田迎擊齊王氏一股而明亮德楞
泰又緊躡高均德一股且李全一股如果由藍厓奔竄藍田亦
係必經之路若三股合爲一夥秦承恩王文雄興肇柯藩自西
而東德楞泰額爾登保明亮自東而西前後夾攻正是極好機
會如賊首仍分股竄逸則當遵照昨旨視何股賊首緊要卽合

力先將一股賊首擒獲後再行勦辦一股斷不可任令闖入楚豫邊界爲要

十三日

公奏言查楚匪滋事以來蔓延數省皆由齊王氏姚之富二犯朋比爲奸首先集衆焚劫同教匪犯妄稱爲總教師到處蜂起附和聽其號令是該二犯尤爲衆惡渠魁屢奉聖明訓飭先令勦辦此股日前齊王氏姚之富與高均德分擾山陽商州經臣等分兵抄擊該匪相繼竄入藍田又經官兵繞前截殺高均德折回山陽鎮安一帶南竄齊王氏姚之富折向山陽石河舖東竄其時額爾登保因張添文李全

等賊匪自盩厔竄及藍田正在迎頭截擊不及帶兵協勦
臣一路官兵不敷兜擊是宜酌量緩急先勦齊逆查石河
鋪路徑歧出可由漫川關高壩店前入豫省又可由上津
堡前入楚北當派賽沖阿帶兵一千漏夜馳至高壩店派
溫春愛星阿等帶兵一千馳至漫川關分投堵截臣同明
亮帶兵四千餘名由黃龍鋪寬坪向漫川關兜剿並可與
賽沖阿等三面夾擊初五日子刻自黃龍鋪發兵辰刻抄
至寬坪正值賊分三路向蓮花池一路竄走臣等帶兵亦
分三路並進賊人排列左右分投抗拒臣親率阿穆勒塔
木騰額副將德甯巴圖魯侍衛等帶兵從大路截殺明亮

同阿哈保副將扎爾杭阿等帶兵搶上左手山梁壓擊圖桑阿率領步隊官兵接續前進賊衆膽敢施放火槍

臣率

領馬兵直前衝殺左山梁之賊經明亮等率領勁旅擁上

壓剿右山梁之賊亦被達音泰等抄上擊殺共殲獲賊匪

一千餘名賊人力不能支分投狂竄

臣

由大路乘勝追殺

明亮同阿哈保達音泰由山梁馳擊該匪奔至尖河口合

爲兩隊一股竄往兩河口經賽沖阿在高壩店聞信帶兵

迎擊一股竄往漫山關經溫春愛星阿等帶兵截殺該匪

仍復折回

臣

趕緊前進與賽沖阿等三面夾攻賊人又折

向西南甘溝一路逃遁是日官兵自子至亥追擊一百七

十餘里斃賊一千四百餘名又由寬坪追殺復斃賊八百
餘名生擒朱孟祥等五百四十三名奪獲騾馬七百餘頭
器械無算賊勢已靡惟首逆尚在竄逃急當乘勝力捕因
兵丁尙有未經趕到者連夜催齊查甘溝西北卽爲楚北
鄖西地界聞鄖西各要隘經汪新飭令鄖陽府王正常該
縣孔繼榦募設鄉勇防禦周密隨飛飭該府縣等督率防
堵臣分兵兩路與明亮等於初六日五鼓帶領滿漢屯土
馬步官兵由上津堡槐樹溝兜剿隨勦隨進未刻將賊匪
追逼至三岔河賊衆男女尙有八九千人猶敢捨死衝撲
占住山梁奔突溝口臣等親率官兵路路截殺正在圍攻

喫緊之際有湖北把總修永宏帶領鄉勇堵勦前來併力
截殺臣恐首逆復又遁逸當將獲賊審訊據供左山梁一

路賊人齊王氏姚之富皆在其內遂將該二犯年歲服色
訊問明確一面飛派兵勇分投將餘賊堵勦一面親同明
亮賽沖阿阿哈保溫春達音泰阿穆勒塔德甯等帶領奮
勇兵丁將左山梁四面圍住該逆尙率男婦三千餘人滾
石放槍力拒官兵四面一擁直上該二逆率衆奔逃至險
峻之處棄馬爬越吉林索倫官兵亦皆下馬同步兵一齊
趕擒臣當卽傳令衆官兵必須生擒首逆解京毋得槍箭
致斃該逆等惶急萬狀齊王氏率婦女十餘人從西南投

落陡崖姚之富亦向懸崖跳下

臣

飛飭擒捕姚之富已跌

傷心坎立時斃命齊王氏尙存殘喘

臣

同明亮親督官兵

將夥黨三千餘衆盡行殲斃其各山梁溝內賊匪分派鎮

將率兵勦捕殲斃四千餘名生擒一千三百餘名內大頭

目王如美訊係自襄陽與姚之富幫同齊王氏起事之人

僞稱大丞相又獲小頭目朱正聲等二十三名均卽凌遲

梟首餘賊概予駢誅初七日黎明勦殺淨盡至齊王氏一

犯初被擒時氣尙未絕當卽訊問業已不能詳供惟自認

齊王氏不諱并提集活犯張成美劉朱氏等令其認識俱

指稱實係首逆齊王氏并稱該逆頭髮翦後復蓄長不盈

尺弁身穿繡衣耳戴金環可據姚之富一犯查訊各犯所稱面貌服色指對相符確鑿無疑當卽傳集各營兵勇及附近人民將齊姚二逆縛割斬梟復將屍骨剗揚軍民目覩無不歡呼稱快並將首級傳示湖北本籍及川陝滋事地方徧行曉諭再當委員解京此股賊匪爲衆逆之魁旣經勦淨省出一路得勝之兵別股賊匪自必聞風震懼臣乘此機會不肯少有遲緩計現在張添文李全一股經秦承恩等痛勦定易得手臣卽日帶兵馳赴山陽勦辦高均德一股總當以東北面爲重卽遇他股賊匪竄近亦卽隨時相機勦辦至此股賊內或有零匪竄匿山林者已飛咨

奏承恩准新飭令該地方官督率鄉勇搜辦並將被擄未
久民人確查省釋連日打仗索倫委防禦領催福珠里委
驍騎校領催圖明阿委驍騎校領催阿里均因殺賊陣亡
協領色爾滾等亦俱受傷其餘陣亡受傷兵丁另行查明
咨部至鎮臣木騰額在苗疆出力年餘現在隨同剿賊日
在前敵尙爲奮勇所帶廣東兵丁實屬得力又隨征滿漢
屯土官兵及隨營辦理軍務各員晝夜跟隨不辭勞瘁容
俟查明覈實再行分別奏請加

恩

諭曰連日盼望捷報正在宵旰莫釋本日已刻遞到德楞泰奏報

殲除首逆齊王氏姚之富並將此股賊匪全行勦蕩覽奏欣悅
但兩首逆均係情急投崖垂斃雖懲割示衆究經未能生擒解
京盡法處治不爲滿意前因明亮係首先領兵之人任聽賊匪
往來奔竄特將伊革職拏問本欲解京治罪嗣復加恩暫留軍
營作爲領隊茲德楞泰戴罪首先領兵得此勝仗殲斃二逆若
非朕加之懲創則將弁等安能人人用命一鼓直前耶明亮此
次因人成事尙不足抵前此遲誤之咎姑念全股賊匪業經殲
淨無遺伊等尙知悔過自新德楞泰著賞給金鑲寶石帶鈎金
鑲松石盒玉喜字搬指大小荷包賽沖阿阿哈保溫春阿穆勒
塔達音泰木騰額德甯明亮並著各賞給金鑲松石盒玉喜字

搬指火鎗包大小荷包木騰額帶領廣東兵丁尙爲得力並著賞戴花翎至湖北把總修永宏聞聲馳赴堵勦尙屬奮勉卽著超陞守備其隨征滿漢屯土官兵及辦理營務帶領鄉勇等項出力各員俟德楞泰查明核奏再行酌量加恩所有殺賊陣亡之福珠里圖明阿阿里俱著咨部加等議卹現在德楞泰等率領勝兵馳赴山陽計此時陝省竄匪中緊要首逆係高均德李全其次卽張添文阮正通務須按名設法生擒解京處治斷不可再令情急自斃倖逃顯戮俟陝境賊匪全數肅清後德楞泰等酌量情形所有各處勝兵以十分之六赴川幫同勒保勦辦川北賊夥以十分之四就近由鄆西取道速赴歸宜一帶幫同

景安等勦辦川東竄匪以期一律甯謐

恭錄

聖製詩

鑑遠堂得句

在廣潤祠旁

乙卯會斯披捷音

乙卯四月詣廣潤祠祈雨後在茲堂傳齋視事適接福康安和琳奏報官軍征勦逆苗

攻克蘭草坪後直抵榔木村用奇兵搗其巢穴分兵五路乘夜

齊進分撲賊卡冒雨爭先斃賊無算遂將黃瓜寨攻克搶占山

梁茨燒賊寨五十六處賊勢大蹙曾有誌事之作書懸此堂壁

間今早詣祠祈雨後仍至此堂視事面諭單機大臣等前歲

會在此披閱捷章或今日亦有喜音馳到底慰企懷辰刻同至

御園而德楞泰奏報殲滅楚匪首逆齊王氏姚之富六百里加

緊之摺果至

溪窗虛俯遠開襟不無望幸今如昔果接飛章報勝吟

是日憩坐之際適接德楞泰奏到捷章楚匪滋事以來蔓延日

久皆由齊王氏姚之富二犯首先集衆焚劫到處逼脅良民抗拒官軍實爲禍首罪魁今同日殲除雖未得生擒解京而首逆均已伏法餘匪自必喪膽亡魂此時陝境之賊惟高均德李全張添文兩股奔竄稽誅經德楞泰等帶領勝兵及額爾登保秦承恩王文雄等分路兜捕不日即可擒渠蕪事其在川境者如徐添德王三槐冉文儔羅其清諸首逆自皆聞風震懼剋日亦可成擒剿捕教匪大功已不啻過半矣披閱捷章因成是什并

識如右

案先是宜綏保舉帶兵將帥謂自顧衰病難以衝鋒惟於各路忠勇大將推誠策厲臣聞額爾登保自期楚賊以至入陝身先士卒奮不顧身德楞泰熟練軍務策畫精明拊循士卒人皆用命明亮屢經行陣地利賊情無不洞悉惟

閱歷既深或遇持重且德楞泰年力較壯聞賊卽行當此
用兵孔急正當驅策羣力以期速奏膚功未幾而殲姚齊
二逆之捷音至

十九日

公偕額爾登保奏言

臣

德楞泰於初八日由鄖西領兵進

發十一日馳抵山陽屬之九里坪先是

臣

額爾登保於初

一日抵湯峪口擊獲賊匪探馬溫智仁等據供張添文李

全等合夥欲往藍田縣城滋擾並欲與高均德齊王氏合

夥當將該犯等凌遲處死官兵趕至小廟口賊匪蜂擁而

來當令綸布春等分爲兩路迎擊

臣

額爾登保率領將弁

由中路衝殺自未及酉殲賊二千餘名餘賊向秦嶺奔逃

初四日追至金井口探知李全張添文等近在小河口卽率兵分路截擊緊躡賊蹤該匪等輾轉奔逃沿途殲戮一千餘人賊衆復從板巖石梯子等處西竄勢將趕上高均德合夥臣額爾登保於初九初十日由峒峪口抄出九里坪適臣德楞泰同明亮從郿西抄道前來遂會晤公同籌酌現在節據探報賊首阮正通冉文儔冷添祿等分股由川入陝在五郎鎮安山陽等廳縣一帶滋擾均可前竄西安省城潼關大道並可闖入楚豫股數既多人數亦衆事宜先以東北爲重查東面一帶漫川關業經總兵路超吉帶領兵勇駐守堵截其北面近省一帶已有秦承恩王文

雄在盩厔郿縣適中之地扼要防堵臣等帶領勝兵務擇
賊匪奔竄緊要道路按股進剿惟有隨時相度機宜上緊
籌辦再臣德楞泰於十二日接准宜縣來咨飛調明亮抽

帶兵二千名速赴興安一帶剿辦當於前敵抽派索倫兵
五百名交圖桑阿管帶廣東兵一千五百名交鎮臣水騰
額管帶明亮卽於十三日由山陽黑山口統率起程星夜

前往

諭曰陝省竄匪齊王氏姚之富俱已殲斃高均德祇係潰散窮蹙
之賊無難一鼓掃蕩乃德楞泰等以現有興肇柯藩帶兵截擊
伊等轉向東北一路截勦阮正通等竄匪豈非緩急失當此時

興安一路本有宜縣在彼明亮又帶兵前往足資協勦德楞泰
額爾登保各有勝兵四千名秦承恩與王文雄追勦賊匪屢得
勝仗今又添山西生力兵二三千名各路聲威均極壯盛惟當乘
勝兜圍將高均德李全張添文阮正通冉文儔冷添祿張漢潮
等悉行擒獲肅清陝境

二十七日

公偕額爾登保奏言

臣

等在山陽九里坪會合酌定後

臣

德楞泰由黑山口一路

臣

額爾登保由界河一路分投進

勦其時明亮因准宜縣調赴興安行至二峪河探知高均

德等賊匪經額爾登保在鳳凰嘴痛剿該匪又竄至軍嶺

川一帶明亮相離甚近卽親帶索倫馬兵及廣東漢兵就近馳擊該匪一見官兵卽搶據山包併力抗拒明亮潛帶勁旅繞至賊人山後衝上撲殺將賊人壓下山包臣德楞

泰額爾登保亦跟蹤匯集三面夾攻殲賊五百餘名生擒

四十五名餘匪翻山疾竄審據獲賊供稱賊首高均德由界河折回欲由雒南竄往豫省查軍嶺川前至商雒路徑

分歧

臣德楞泰隨率同賽沖阿阿穆勒塔達音泰圖桑阿

扎勒杭阿愛星阿巴圖魯侍衛等由右一路雒南紅口河

寶安街抄擊臣額爾登保率同綸布春長春慶溥豐紳楊

遇春汪啟等由左一路藍田牧護關躡勦明亮率同阿哈

保溫春木騰額德甯巴圖魯侍衛等由中一路商州黑峪

口鐵爐子橫衝腰截該匪星夜奔竄十七日由寶安街前

竄雒南經

臣

德楞泰率同賽沖阿等迎頭將賊人前隊擊

敗該匪退屯大鹿寺十八日黎明

臣

額爾登保已趕抵該

處賊匪由楊家河一帶敗竄時

臣

德楞泰正由張家灣繞

出迎截該匪欲折向老林山竄走經明亮率兵由東桃坪

衝出擊殺將賊匪逼勦至雒南兩岔河一帶該匪情急搶

據山頭將矛排列於前併力抵抗揚言欲爲齊王氏等復

仇相誓死鬪情形極爲兇悍

臣

等激勵官兵分路殲勦不

遺餘力賊人東突西奔亡命衝撲四次被官兵東西截殺

將衝先賊匪殲擒過半積屍滿山谷計殺賊二千三四百名生擒三百八十一名敗殘之賊慌忙竄入秦嶺深林臣等見擊斃賊內有臨陣號召夥黨儘力抗拒者必係頭目當將首級令活賊識認內有白號僞元帥高大僞總管高二俱係高均德胞兄又有藍號僞元帥宋大宋三嚴姓僞先鋒崔德友黃號僞元帥王林高等七犯均係襄陽人卽將高大等首級梟示復就餘犯審訊高均德下落僉供因見官兵勇銳高均德先從山後逃走想必逃入老林官將該犯等駢戮查高均德一股此時勢亦窮蹙臣等乘勝帶兵仍分左右兩路併力勦辦務將首逆生擒

諭曰高均德一股竄匪經德楞泰額爾登保分路兜擊而明亮行至二峪河探知賊蹤不卽馳赴興安卽與德楞泰等合勦所見尙是此次殺斃二千餘名又殲其頭目多人勢益窮蹙現在該逆逃入秦嶺深林德楞泰額爾登保等已帶兵兩路兜勦務剋期生獲解京高均德就獲後卽當酌量情形或明亮前赴宜縣一路協勦阮正通或德楞泰等同帶勝兵前往更可得力惟在察看緩急機宜妥爲籌辦

同日公又奏言

臣欽奉

諭旨以殲斃齊姚二逆令將隨征滿漢帶兵及辦理營務帶領鄉勇等項出力各員查明核奏當同明亮等秉公確查謹就

武員中殺賊最多及首先衝入賊隊殺賊者文員內帶領
鄉勇協勦及辦理營務出力催償糧餉無誤者核實開單
懇

恩俯准獎勵再齊姚二首逆昨由沙狐嶺折向東北竄逃委係遊
擊馬瑜詳探稟報官兵得以分路截勦迅速蕪功可否將
該遊擊

量加鼓勵之處出自
天恩奏入奉

旨遊擊馬瑜著加恩以參將陞補其餘均獎擢有差